

Mbote na nkombo ya Nkolo ya Bomoi, Mokonzi ya bakonzi, mpe Nkolo na biso Yesu Klisto. Lokumu, limemya, mpe nkembo ezala epai na Ye libela na libela. Amen.

Boyei malamumu na boyekoli oyo ya Biblia. Lelo tokotalela bilembo ya ntina oyo Biblia epesi mpo na koyeba Mpinga-Klisto oyo esakolami ete akobima na mokili liboso ya nsuka ya tango. Na mikolo oyo eleki, bososoli ya mabe ebimi mingi — basusu balobaka ete Mpinga-Klisto azali mokonzi moko ya Freemason, basusu balobaka ete auti na lifelo, to mpe ete vaksé ya COVID-19 ezali elembo ya nyama (666). Kasi Biblia elobi nini solo?

Yesu akebisaki ete bato mingi ya mpinga-klisto bazali deja na mokili.

“Bana mike, ezali ngonga ya nsuka; mpe ndenge boyokaki ete mpinga-klisto azali koya, sikawa bato mingi ya mpinga-klisto babimi.”

— 1 Yoane 2:18

Nzokande asakolaki mpe Mpinga-Klisto moko ya nsuka oyo akobima mpo na komema libebi monene.

“Moto moko te akosa bino... mpo ete mokolo wana ekoya te soki botomboki eyeli liboso te mpe ‘moto ya mabe’ amonisami — moto oyo abungaka.”

— 2 Batesalonika 2:3-4

Mpinga-Klisto oyo ya nsuka akobima na “tango ya nsuka,” mpe bokonzi na ye ekozala mokuse kasi makasi.

“Nyama epesamaki monoko mpo eloba maloba ya lolendo mpe ya kofinga Nzambe... mpe epesamaki bokonzi mpo na sanza ntuku minei na mibale.”

— Emoniseli 13:5

“Akosala boyokani makasi na bato mingi mpo na mbula moko ya poso; kasi na kati ya poso akosukisa bambeka...”

— *Danyele 9:27*

Soki bomoni bilembo oyo nyonso epai ya moto moko, bokoyeba ete tango ya nsuka ekómi pene.

1) Akouta na Lingomba moko ya Kala

Na bokeseni na makanisi ya bato mingi oyo bakanisaka ete Mpinga-Klisto akobima kaka na mbalakaka, Biblia emonisi ete akouta na nguya moko ya monene ya lingomba mpe ya politiki — bokonzi ya Roma oyo ekosekwa lisusu, bokonzi ya “molimo” oyo euti kala mingi. Bokonzi yango ekozongisa nguya na yango pene ya nsuka ya mokili.

Biblia elakisi esika ya nguya yango:

“Nyama oyo ezalaki, mpe ezali lisusu te, azali mokonzi ya mwambe. Azali moko ya bato nsambo mpe azali kokende na libebi.”

— *Emoniseli 17:11*

“Mokonzi ya mwambe” oyo elakisi kozonga lisusu ya bokonzi moko ya

kala oyo emonisami na moto ya lingomba mpe ya politiki.

2) Mokili Mobimba Ekokamwa na Ye

Mpinga-Klisto akokamwisa mokili na misala na ye ya kokamwa mpe nguya na ye. Bikolo, mabota, mpe minoko ekolanda mpe ekosambela ye.

“Mokili mobimba ekamwaki mpe elandaki nyama... basambelaki dragon mpo epesaki nyama bokonzi.”

— Emoniseli 13:3-4

Bato mingi bakomona ye lokola moto ya mabe te, kasi lokola mobikisi ya bolamu. Kaka batikali ya sembo nde bakotelemela ye.

3) Bakobenga Ye Moto ya Kimia

Akoyebana mpo na komema kimia mpe bokengi, kosukisa bitumba mpe matata — ata soki ezali mpo na mwa ntango.

“...Moto moko ya kotyola akobima... akoya na kimia mpe akozwa bokonzi na mayele.”
— *Danyeke 11:21*

Kimia na ye ekozala ya lokuta, mpo ekozala nzela ya kozwa kondimama ya mokili mobimba.

4) Akosala Bikamwa mpe Bilembo ya Lokuta

Na nguya ya Satana, akosala bilembo mpe bikamwa mpo na kokosa bato mingi.

“Koya ya moto wana ya mabe ekozala kolanda mosala ya Satana, na bikamwa nyonso ya lokuta, bilembo mpe makamwisi, mpe na bokosi nyonso ya mabe mpo na bato oyo bazali kobunga.”
— *2 Batesalonika 2:9-10*

Ndenge Janes mpe Jambres batelemelaki Moize, Mpinga-Klisto mpe akomekola misala ya Nzambe mpo na kobungisa bato.

5) Akosenga Bato Basambela Ye Lokola Nzambe

Akotombola ye moko likolo ya nzambe nyonso to eloko nyonso oyo basambelaka. Mokano na ye ya suka ezali ya kofanda na tempelo ya Nzambe mpe komibenga Nzambe.

“Moto ya mabe... atelemelaka mpe amitombola likolo ya nyonso oyo babengaka Nzambe... afandi na tempelo ya Nzambe mpe amibengaka ete azali Nzambe.”
— 2 Batesalonika 2:3-4

6) Akoloba Maloba ya Kofinga Nzambe

Akofinga Nzambe mpe akonyokola Lingomba ya solo, koluka kozongisa solo ya Nzambe na lokuta.

“Epesamaki ye monoko mpo aloba maloba ya lolendo mpe ya kofinga Nzambe... mpe epesamaki ye nguya ya kobunda na basantu mpe kolonga bango.”

— *Emoniseli 13:5-7*

7) Nkombo na Ye Ekozala na Motango 666

Nkombo na ye ekokani na motango 666 — motango ya nyama.

“Asalaki ete bato nyonso bazwa elembo na loboko ya mobali to na elongi, mpo ete moto moko te akoka kosomba to koteka soki azangi elembo... Oyo esengi bwanya: moto oyo azali na mayele atanga motango ya nyama, mpo ezali motango ya moto — 666.”

— *Emoniseli 13:16-18*

Motango oyo ezali elembo ya kozanga kokoka mpe botomboki, kozanga kokoma na bobongi be ya bonzambe (7).

Soki bizaleli oyo nyonso emonani esika moko epai ya moto moko, bokoki koyeba ete Mpinga-Klisto amonisami mpe pasi monene ebandi. Mokili ekozala lisusu na koleka mbula nsambo te liboso ya nsuka.

Bato oyo bakomatama te na raptere bakonyokwama na bokonzi na ye, bakokoka kosomba to koteka te soki bazangi elembo na ye.

“...mpo ete moto moko te akoka kosomba to koteka soki azangi elembo.”

— Emoniseli 13:17

Moto oyo akoki kozala na bomoi lelo, afandi na kiti ya bokonzi ya lingomba, azelaki tango na ye. Raptere ekofungola nzela ya bokonzi na ye, mpe akobanda kosalela mabongisi na ye ya bokosi mpe libebi ya mokili.

Oyo nde “Likambo ya Nsoni ya Libebi” oyo Danyele mpe Yesu balobelaki.

“Boye, soki bomoni Likambo ya Nsoni ya Libebi... etele mi na esika esantu...”

— Matai 24:15

Moninga molingami, motuna ezali: ozali na ngambo ya nani? Soki Yesu azongi lelo, okobongama mpo na kokutana na Ye? Pona ezali ya yo.

Maranatha — Yaka, Nkolo Yesu.

Share on:
WhatsApp